

Sabat òf Dia di Señor?

Den último luna, diferente interrogante, komentario i debate a tuma lugá na Voz di Boneiru relashoná ku sabat. Nos ke nota kiko Beibel ta bisa.

Despues ku Dios a krea tur kos, El a sosegá e di shete dia (Gènesis 2:1-3), estableciendo e prinsipio di sosiegu 1 dia den 7. Durante e revolushon franses, nan a purba kambí'è pa 1 dia di sosiegu kada 10 dia. E tabata un frakaso total. Ta un echu ku tur hende di tur era mester sosegá kada 7 dia.

Ma Dios no a establecé sabat te (kisas) 2500 aña despues. Durante tur e siglonan ei, sabat ni ta mensioná. Maske Adam, Noe, Abraham, Isaak, i Jakob lo a sosegá 1 dia den 7, no tin evidencia ku nan a warda sabat. Di bèrdat, e palabra “sabat” no ta aparecé den Beibel mes te Eksodo 16:23...**despues ku Israel a bira un nashon.** E ora ei numa Dios a duna mandamentu pa warda sabat (Eksodo 20:8-11).

Pakiko? Pasobra sabat tabata un señal entre Dios i **Israel**. “...*esaki ta un señal entre Ami i boso durante di tur boso generashonnan...yunan di Israel mester warda sabat, pa selebrá sabat durante di tur nan generashonnan komo un aliansa perpetuo.*’ **E ta un señal entre Ami i e yunan di Israel pa semper...**” (Eksodo 31:13,16-17).

I Deuteronomio 5:15 ta avisá Israel: “*Kòrda ku bo tabata esklabu na tera di Egipto i ku SEÑOR bo Dios a sakabo for di ayanan...p’esei SEÑOR bo Dios a ordenábo pa warda dia di sabat.*” Pues, Israel mester a warda sabat 1) pasobra Dios a libra Israel for di Egipto i 2) pasobra sabat ta un señal entre Dios i Israel. Tambe 3) sabat tabata aplikashon di e prinsipio di 1 dia di sosiegu kada 7 dia.

Hesus a introdusí un cambio importante. El a kumpli ku henter e lei ku Moises a duna, kibrando poder di lei. Despues di Su morto, nos no ta bou lei di Moises mas. “...*boso no ta bou di lei, ma bou di gracia... boso tambe a muri pa Lei dor di kurpa di Kristo... nos a wòrdu librá di Lei, siendo ku nos ta morto pa e lei...*” (Romanonan 6:14; 7:4,6). P’esei apòstel Pablo ta konsehá, “...*no laga ni un hende aktua komo boso hues enkuanto...dia di Sabat—kosnan ku ta djis sombra di loke mester bin... Esun ta konsiderá un dia mas ku e otro; un otro ta konsiderá tur dia meskos. Laga kada hende ta kompletamente konvensí den su mes mente*” (Kolosensenan 2:16-17; Romanonan 14:5-6).

Tur Dies Mandamentunan ta repetí den Tèstament Nobo, ku eksepsion di un: **e mandamentu pa warda sabat.** Pakiko? **Sabat no ta na vigor mas!**

Kiko a remplas’è? Ningun teksto ta duna e kontesta. Sinembargu, Hesus a resusitá riba promé dia di siman. El a aparecé despues di Su resurekshon prinsipalmente djadumingu. Pentekostes—dia ku Spiritu Santu a bin i iglesia a nase—tabata djadumingu. Komo resultado ta parse ku iglesia a establecé e patronchi di sigui reuní riba promé dia di siman (Echunan 20:6-7; 1 Korintionan 16:1-2). Asta nan a yam’è “Dia di Señor” (Revelashon 1:10), nifikando “dia pertenesiendo na Señor”.

Dokumentonan di e promé siglonan ta demonstrá kla ku kristiannan a fiha djadumingu komo un dia spesial. *Didache*, un manual di adorashon kristian, (skirbí mas òf ménos ana A.D. 120) ta bisa, “Riba Dia di Señor boso reuni huntu, i kibra pan, i duna gradisimentu, i konfesá boso transgreshonnan ...” E *Karta di Barnabas*, fechá entre A.D. 70-130 ta afirmá: “...nos ta warda e di 8 dia ku alegria, e dia ku Hesus a resusitá...” Justin Martir, discípul di un alumno di apòstel Juan a skirbí na aña ± A.D. 155, “Djadumingu ta e dia ku nos tur tin nos asemblea di komunión, pasobra...Hesu-Kristo nos Salbador riba e mésun dia a resusitá for di morto. I riba e dia yamá djadumingu, tur...ta reuni huntu na un sitio, i e skirbimentu di e apòstelnan, òf e skirbimentunan di e profetanan, ta lesá asina tantu ku tempu ta permití.” Nos por sita hopi otro dokumento antiguo.

No tabata te aña 321 ku emperador Konstantino, introduciendo un era nobo, a hasi djadumingu e dia ofisial di sosiegu, rekonosiendo e cambio pa dia di Señor ku ya kaba a tuma lugá.